



ISMAIL Sabri (empat dari kiri) mempengerusikan Mesyuarat Menteri Besar dan Ketua Menteri ke-139 di Putrajaya, semalam.

Inisiatif **jamin** bekalan makanan

Kerajaan Persekutuan, negeri tubuh Jawatankuasa Sekuriti Makanan

Oleh Suraya Roslan
suraya@hmetro.com.my

Kuala Lumpur

Jawatankuasa Sekuriti Makanan peringkat negeri dan daerah ditubuhkan bagi memastikan pelaksanaan Pelan Tindakan Dasar Sekuriti Makanan Negara 2021-2025 yang sinergi di antara Kerajaan Persekutuan dan kerajaan negeri.

Perdana Menteri Datuk Seri Ismail Sabri Yaakob berkata, persetujuan penubuhan jawatankuasa itu disepakati ketika beliau mempengerusikan Mesyuarat Menteri Besar dan Ketua Menteri yang turut dihadiri oleh Menteri Kabinet yang berkaitan, semalam.

“Mesyuarat kali ini memberikan penekanan mengukuhkan kerjasama antara kerajaan Persekutuan dan kerajaan negeri bagi memperkasakan sekuriti bekalan makanan negara yang berdepan dengan pelbagai cabaran akibat daripada senario global pada masa kini.

“Cabaran ini dipengaruhi oleh faktor antaranya peningkatan harga input pertanian, seperti harga jagung bijian dan baja, kenaikan kos logistik serta cuaca ekstrem

yang menyebabkan kekerapan berlakunya banjir dan kemarau yang mengganggu kitaran pengeluaran makanan,” katanya.

Beliau berkata, dalam mesyuarat itu, kerajaan negeri bersetuju melaksanakan inisiatif antaranya meningkatkan keluasan tanah sesuai khususnya tanah milik negeri untuk aktiviti pertanian, mewartakan kawasan tanah pertanian sebagai tanah rizab mengikut Seksyen 62 Kanun Tanah Negara (KTN) dan memajakkan tanah rizab berikut di bawah Seksyen 63 KTN untuk tempoh sekurang-kurangnya 10 sehingga 21 tahun.

“Selain itu, memperkasakan pemberian tanah milik negeri kepada anak syarikat kerajaan negeri berkaitan pertanian yang kemudiannya akan memajakkan tanah kepada usahawan tani untuk tempoh 30 tahun.

“Malah, pihak berkuasa negeri boleh, tertakluk kepada kaedah tanah negeri meluluskan tempoh sekurang-kurangnya tiga tahun dan boleh dilanjut seterusnya bagi setiap Lesen Pendudukan Sementara (TOL),” katanya.

Ismail Sabri berkata, mesyuarat bersetuju mengemukakan pengezonan kawasan



Kerajaan Persekutuan bersetuju untuk mempertimbangkan cadangan pengurangan atau pengecualian cukai terhadap industri agromakanan”

Ismail Sabri

jelapang padi, pewartaan Taman Kekal Pengeluaran Makanan (TKPM) dan membangunkan TKPM yang terbengkalai serta yang belum dimajukan.

“Selain itu, mengekalkan pewartaan Zon Industri Akuakultur (ZIA) sedia ada dan mewartakan ZIA yang belum diwartakan.

“(Antara lain) menyelaraskan bersama pihak berkuasa tempatan bagi memudahkan syarat dan proses kelulusan Kebenaran Merancang (KM) pembangunan sistem reban ayam tertutup dan aktiviti agromakanan yang lain dan menubuhkan Jawatankuasa Pembangunan Tanah Pertanian Peringkat Daerah bagi memudahkan cara urusan membangunkan tanah pertanian

milik persendirian yang tidak diusahakan,” katanya.

Menurutnya, mesyuarat juga bersepatok supaya menetapkan kadar caj abstraksi bagi sumber air tawar dan air masin yang lebih rendah untuk sektor agromakanan.

“Selain itu, Kerajaan Persekutuan bersetuju mempertimbang cadangan pengurangan atau pengecualian cukai terhadap industri agromakanan dan Kementerian Kewangan akan memberi perincian,” katanya.

Katanya, mesyuarat memutuskan untuk menubuhkan Jawatankuasa Khas Penderagaman Kos Caj dan Fi bagi Pembangunan Infrastruktur Komunikasi di Peringkat Negeri.

“Penubuhan jawatankuasa ini bagi mengkaji dan mencadangkan mekanisme penyeragaman kos caj dan fi dikenakan bagi pembangunan infrastruktur komunikasi di seluruh negara.

“Ini disebabkan pemantauan Suruhanjaya Komunikasi Multimedia Malaysia (SKMM) mendapati kos caj dan fi pihak berkuasa negeri, pihak berkuasa tempatan, agensi pusat sehenti dan agensi berkaitan di seluruh negara adalah berbeza,” katanya.